

日本漢文學百家集

王焱 編

335



北京燕山出版社



王焱 主編

日本漢文學百家集
335



北京燕山出版社

第三三五册

蒼海全集 卷四至卷六 副島種臣著 大正六年
.....
一

蒼海全集
卷四

蒼海全集卷四

武井義

男 道正輯 門人 鈴木於菟之助校

佐佐木哲太郎

紅葉館同清欽差大臣黎書記孫朝鮮辨理公使金次長
岡通侯韻 三首

琴瑟相和奏。樂哉此玉堂。維時逼寒節。零露透衣裳。人聚三州
秀。坐傳百蓋忙。金風入楓樹。葉葉翻欲狂。

慚抱薄材質。幸陪君子堂。邦隣脣與齒。情契袂連裳。秋敍催鴻
早。賓筵議禮忙。美人新白紵。雲雨戒迷狂。

秋光廷幕冷。華燭燦高堂。紅葉染侵座。黃花啓映裳。樂興憂感
切。饗飲侍人忙。竊述斯時樂。樂饒使筆狂。

秋晚邀張先生飲。遂柬梧竹。

饗無甘旨已如何。夫子飄蕭枉駕過。節士性情嘗苦得。騷人憂悶味酸多。笑窺叢菊英英色。醉撫孤松磊磊柯。乘興未須言日夕。辛勞待出月中娥。

秋盡日會鳳文館。追悼神陽先生。

二三子之嬋妍兮。會鳳文之高堂。談仁義之煜煜兮。拂楚楚之衣裳。仰高穹之寥廓兮。翮鴻雁之南翔。謂秋氣之將盡兮。百芳靡以摧藏。諒節物之感人兮。自古共懷勞傷。夫逝者不可招兮。幾流涕于神陽。夫子之鑄冶才兮。二三子其毓相。矧乎吾之親眷兮。已弟兄之雁行。其朝啓而夕誨兮。其日就而月將。其年琢而歲磨兮。匡翼未之暇遑。咨名分之紊亂兮。惜皇輿之頽荒。奮節義乎振策兮。奚一旦以躬殤。二三子之學業兮。加秉性之純。

良。顧余色而慘慘兮。伊日而未克忘。惟天道之無親兮。獨遺余之披猖。嗟明治之聖世兮。賢者弗贊夫運昌。葉索索而辭柯兮。撫森束之林蒼。寒泉潺湲不回兮。聲聽彼其琳琅。

秋日陪 內讌作 五首

秋風南苑菊花新。聖后閒游懷吉辰。供奉臣員隨侍講。蕭然

齊是白髯人。

臣及元
田侍講

苑中豔菊不勝秋。賢后藻懷徒步游。本自行廚從儉素。聖

皇有命命無尤。

后宮 聖讌許攀陪。百菊叢前賜 御杯。爲是朝廷恩澤甚。宮

門退出待晡回。

菊花蕭灑一叢叢。茅屋柴門小逕通。借問平生誰住在。大家

惟日 御茲中。

宮日暉暉燦菊英。大夫臣有郁馨誠。大香共陪大川內讌歌。君

德。掌侍句存懷道情。原掌子侍

御苑菊。做寬平體。

異邦賞愛在黃花。自古吾朝喜白葩。御苑近年兼種植。清秋
九月富繁華。宮牆上下馨馨馥。禁掖縱橫簇簇霞。曾道寬平

聖皇宴。更將文筆付管家。

擣衣三首

挽羅袂兮出纖手。招文礎兮倚玉牖。念妾新婚初。春風度綠柳。
妾迎揖郎前。郎入隨妾後。妾席常貴左。郎枕更張右。山澤久易
理。女男例嘉偶。此夕鳴鴛鴦。隔床哈保母。清濁混涇渭。賢愚奈
夫婦。時序且日馳。一夜耀秋斗。郎今不見關東走。謂舉義兵佐
明后。在家唯有少婦守。一杵一上又一下。自憐聽此聲不醜。

西漢寥寥向人垂。荒村搗杵一聲悲。一聲悲兮萬聲應。一人嘆
兮萬人咨。自昔室家常相保。九月授衣周公詩。北風瑟瑟入戶
牖。卒歲無褐何爲宜。近年田家苦穀賤。公稅貢金茲叵爲。百結
斑斕尙五色。老萊雖至應莫唉。

楓葉荻花何悠悠。御苑砧聲向來稠。夫一葉脫而知天下之
秋。一人哭而知天下之憂。是聖主之所用心。明哲賢臣所與謀。
仁政於此乎出。天下無怨愁。若夫詞人賦搗衣。豈以苦寒所切
恟。楓葉荻花一時飄。砧聲聽斷人回頭。侍講之臣作此詩身承
新寵早襲裘。

張滋昉宮鳥誠竝見訪草堂

宮鳥子兮携詩章。莞然過訪攀我堂。一籬黃菊九秋盡。小盆寒
蘭遺馥香。清國貴紳張滋昉。相看竝揖美目昌。謂子於文何太

佳。終生不憂白氏慶。余時使妻侑酒觴。鐘漏沈沈清夜長。滿天
燦燦少微星。江上蒹葭霑兩霜。有興不諧主酌罪。三人寂寞燭
正煌。參兮錯兮釵影光。

同石丸安世長森敬斐分秋盡日得盡字。

風威夜夜嚴。霜節朝朝緊。繁華看云銷。已逼九秋盡。惟吾懷憂
愁。屢懼宗室閔。每驚節物感。奉公志先落。翮我二三子。高才既
雄敏。擿藻挾天衡。騁懷攀翼軫。不以余無似。曾常被稱引。紛此
高堂會。攄情墨毫吮。江中冷鯉魚。雲際急鷹隼。回顧良寂寞。晷
景沒西嶙。

初冬出門

寒節促孟冬。玄陰蔽四野。昧際西頽景。我憂何用寫。出門無所
見。風霜拂梧檟。蘭蕙悉皆謝。遺馨不盈把。菊殘亂黃金。楓散敷

丹楮雁鳴度雲端。蟀哀入床下。浮雲往不歸。溝瀆唧唧瀉。先輩成陳人。獨茲栖栖者。

上張公堂宴飲

訪張公子上金堂。蘭膏蕙燭暉煌煌。翠帳搖曳鸞迴翔。薰馨先聞博山香。瓊液進兮和瑤漿。兕之觥兮玉之觴。羹鷄豚兮炮羔羊。盤中味兮皆共芳。張公子兮才異常。謂吾足談氣激昂。挽漢倒河珠跳踉。駕鵠須臾成橋梁。月琴奏兮夜正長。合羽引商兮彷徨。待人無至心相傷。千山楓葉一時霜。

侍講永孚賜杖。令侍講種臣紀之。

皇帝入山策馬來。折取古木紛糾回。聳巒排霧叱龍虎。斷路入溪奔電雷。漢文元道善驅馳。區區諫拒張釋之。允文允武 皇帝有。駕乘到處天爲開。折取古木何所爲。離婁班輸巧思催。斬

截丈尺準矩規。目度心臻。手鋸戔。筇成賜之臣永孚。永孚奉謝感泣。斯頂戴拜觀極輪奐。鏤銀猶是燦燦堆。永孚教臣遂錄伊臣文焉。倣韓愈辭。優孟嘗擬孫叔敖。苦心惟有楚莊知。臣按永孚忠且亮。加以謹慎待。禁闈其言不出。永無咎。經筵進講書及詩。爲人大類金日磾。桓榮學識而兼茲。皇帝信用將無比。賜杖故事明主滋。永孚自詩引其類。紀恩之作情其宜。臣之攄陳在。帝德。帝德曜曜日月輝。厥初。帝令。后宮言。永孚老矣髮絲絲。胡不常携筇一枝。頻今疾足。帝所悲。臣時在側。詳聽此。皇帝夫婦實兩儀。道德在躬躬率下。百僚師師勿輕非。臣初識。帝中興歲。帝尙茲在幼冲時。雖寡言語意識靜。神武帝胤岐嶷姿。余與岩公言此事。以德佐之天下治。岩公大喜以爲然。如何弗祚身先灰。臣與永孚久同僚。臣之無似常。

恩私宜矣。永孚在光寵。永孚忠良觀臣詞。杖乎筇乎靈壽杖。千秋萬歲人扶持。

贈高崎正風。

當世天下善詞章。正風先生名夙揚。先生風采元蕭疏。先生綺情滿腔腸。一從薦稱侍九禁。恩寵日日夜夜彰。兩宮詞章賜內覽。先生忠懇未敢遑。先生詞章取何法。貫之躬恆嘗擅場。清水芙蓉綽綽出。晴空鶴影翩翩颺。憶昨貴園共酒觴。團欒林中聽鷓鴣。在座諸君朝中貴。不似吾獨衰頹唐。先生卽問余近況。貧士篇傲山憶良。邇來江上戒天寒。往矣且自慎風霜。

冬日出北門

冬日熹光猶到頭。坐歎不若行歌游。出門去。路一何悠悠。雲色絕倒愁。鴉影傾倒愁。登彼荒隴以望四疇秋。大風雨餘糶初休。

黃梁縱橫。將穫將收。溝瀆唧唧。寒泉其流。嗟彼北方諸野岷。今
頻陷於盜賊。儔法觸三尺之虔。劉而未聞引咎悔尤。懷此切人
憂。

寒 月

誰使兔公擎玉盤。中盈靈藥不堪寒。曉來悉化霜華落。窮巷士
人衣褐看。

姪諸岡正順輓歌 二首

志節當年天欲回。一朝入地不歸來。吾道蕭寥日云甚。冢前弔
哭轉堪哀。

輜車駕白馬。徒御爲裴徊。銘旌老叔書。當察臨筆哀。甚惜雄毅
姿。去趨長夜臺。古人謂命也。不止哭顏回。儻見天主者。願試磊
落才。彼奪生前福。而樂身後災。是亦蝨賊耳。窮詰勿屈哉。

穀貴行

白日鬼嘯青柳陰。其聲啾唧嘆恨深。春來穀貴多飢餓。負子而死綠川潯。世有茲事我哀此。逝者無反東流水。要路何不行仁政。道拯天下始稱士。

無墨奏上千雁圖。令余賦此。

秋深澤國稻梁肥。群雁嗷嗷相喚飛。主獵官人休借問。物情久欲射彈稀。

寄博文

罷相春來賞牡丹。牡丹落盡奈清觀。夏時菡萏秋時桂。四序成功仔細看。

夏日咏

支子加香蓼。苦辛夙皆嘗。誰謂夏日永。未及我嘆長。僕本寒微

士起家佐興王。遭遇隆盛運。休命在對揚。智淺慮已短。氣麤性仍剛。曾上平邊策。儵臻挂珪璋。行吟岳飛墳。困頓秦伯鄉。躊躇延陵墟。質正咎繇傍。時豈不飢渴。宿志未能忘。欲報國厚恩。頗謂心攸臧。而今世界內。弱者制于強。滄桑年年變。邦邑日日亡。是豈逸豫時。念此摧五臟。

白雲篇

白雲洋洋高不低。安得乘渠試上躋。上叩天闈請面命。四極八方施嚴令。別邪祛疾除所疚。氓不天札共稱慶。今托帝名說道者。掠奪人國是暴橫。世界戰鬪無休時。茲輩性行罕畏敬。陛下柔仁多容忍。斬而後奏臣厲行。眄睠下寰憫良民。由來天道未神聖。已焉哉。如今人先老。南山豹霧藏亦好。由是宇宙屬鬼蜮。白晝罔兩已啾唧。倘誦吾詩知所感。